

BOSNA I HERCEGOVINA
FEDERACIJA BOSNE I HERCEGOVINE
UNSKO-SANSKI KANTON
GRAD BIHAĆ
GRADONAČELNIK

Broj: 10/1-22-6368-1
Bihać, 11.12.2017. godine

Na osnovu člana 52. Statuta Grada Bihaća ("Sl.glasnik Grada Bihaća", br.13/15)
Gradonačelnik u svojstvu predlagača propisa i drugih akata:

O D R E Ć U J E

Izvjestioca: Jasminu Beširević, na sjednici Gradskog vijeća i radnim tijelima prema prijedlogu
tačke dnevnog reda:

Prijedlog Odluke o osnivanju Turističke zajednice Grada Bihaća

GRADONAČELNIK
Šuhret Fazlić

BOSNA I HERCEGOVINA
FEDERACIJA BOSNE I HERCEGOVINE
UNSKO - SANSKI KANTON
GRAD BIHAĆ
GRADONAČELNIK
Služba za upravljanje lokalnim razvojem

Broj: 10/1-22-6368-2
Bihać, 11.12.2017.godine

Gradsko vijeće
Grad Bihać

PREDMET: Prijedlog Odluke o osnivanju Turističke zajednice Grada Bihaća

Na osnovu člana 52. stav 1. tačka a) Statuta Grada Bihaća („Službeni glasnik Grada Bihaća“ br. 13/5) i člana 140. Poslovnika Gradskog vijeća Bihać („Službeni glasnik Grada Bihać“ br. 3/16) u prilogu ovog akta dostavljam: Prijedlog Odluke o osnivanju Turističke zajednice Grada Bihaća.

Pravni osnov za donošenje

Pravni osnov za donošenje Prijedloga Odluke o osnivanju Turističke zajednice Grada Bihaća sadržan je u članu 73. stav 3. Zakona o turizmu Unsko-sanskog kantona („Sl. glasnik Unsko-sanskog kantona“ broj: 8/17) kojim je određeno da Turističku zajednicu grada osniva Gradsko vijeće (osnivač) i članu 35. tačka c) Statuta Grada Bihaća kojim je utvrđena nadležnost Gradskog vijeća za osnivanje javnih preduzeća i javnih ustanova i drugih pravnih lica za obavljanje komunalnih, društvenih, privrednih i drugih djelatnost od interesa za Grad, te odlučivanje o njihovim statusnim promjenama i prestanku rada u skladu sa zakonom.

Razlozi za donošenje

Gradsko vijeće Grada Bihaća na svojoj sjednici, održanoj dana 25.10.2017 godine svojim Zaključkom, br.GV-22-7169, prihvatilo je Nacrt Odluke o osnivanju Turističke zajednice Grada Bihaća. Zaključkom je utvrđen način i postupak provođenja javne rasprave u periodu od 01.11. do 30.11. 2017 godine i imenovano radno tijelo za provođenje javne rasprave.

Shodno Zaključku javna rasprava je provedena u utvrđenom periodu: Nacrt Odluke postavljen na info pult gradske uprave, na web stranicu grada, dostavljen u pismenom obliku, ali i elektronski – putem mail-a, na adrese utvrđene Zaključkom. U toku trajanja javne rasprave, niko se nije očitovao na Nacrt, nije bilo niti pisanih, niti usmenih primjedbi, prijedloga ili sugestija.

O završnoj javnoj raspravi održanoj 01.12.2017 godine, zainteresirani su bili obaviješteni putem web stranice grada i pismene obavijesti postavljene na ulazu u zgradu gradske uprave i na vidnim mjestima u prizemlju zgrade.

Završnoj javnoj raspravi prisustvovali su predstavnici: NP UNA Bihać, Ministarstva privrede USK, Turističkog klastera UNA Bihać, udruženja građana IPSIA BiH, Centar za održivi razvoj UNA, nekolicina zainteresiranih građana i predstavnici gradskih Službi.

Rasprava se vodila uglavnom o svim aspektima turizma, ne samo o Nacrtu Odluke, te osim prijedloga da se ispita mogućnosti za prijenos nadležnosti inspekcijskog nadzora u oblasti turizma i ugostiteljstva sa kantonalnog na gradski nivo. Na tekst Nacrta Odluke nije bilo primjedbi.

Primjedbe Statutarne komisije Gradskog vijeća na Nacrt Odluke, koje su se ticale skraćenog naziva Turističke zajednice Grada Bihaća, pečata i Satuta su prihvaćene i kako je to Komisija i tražila, uvršteno u Prijedlog Odluke o osnivanju Turističke zajednice Grada Bihaća.

TZ Grada Bihaća znatno će olakšati planske i programske aktivnosti grada u ovoj oblasti, kao direktni učesnik svih procesa planiranja. Popularizaciju i raznovrsnost turističke ponude u gradu treba podići na viši nivo, te otvoriti bezbroj mogućnosti za ekonomski razvoj grada, obzirom da je turizam i jedna od „najprofitabilnijih industrija u svijetu“.

Šanse da Bihać bude zanimljiva turistička destinacija su velike i ova oblast se ne smije prepustiti stihiji, nego planskom razvoju specifičnih oblika turizma zasnovane na prirodnim (zdravstveni turizam, sportski turizam, ekoturizam, seoski turizam, lovni i ribolovni turizam) i na društvenim resursima (kongresni turizam, kulturni turizam, gastronomski turizam, turizam događanja, turizam na umjetno stvorenim atrakcijama i dr.).

Potrebna finansijska sredstva

U Budžetu Grada Bihaća su obezbjeđena finansijska sredstva za osnivanje i redovnu djelatnost Turističke zajednice Grada Bihaća.

U skladu sa navedenim predlažem Gradskom vijeću da nakon razmatranja, u smislu člana 140. Poslovnika Gradskog vijeća (“Sl. glasnik Grada Bihaća”, br. 3/16) usvoji Prijedlog Odluke o osnivanju Turističke zajednice Grada Bihaća.

Prilog:1.

1. Prijedlog Odluke o osnivanju Turističke zajednice Grada Bihaća

Dostavljeno:

1. Naslovu
2. Evidencija
3. a/a

GRADONAČELNIK

Šuhret Fazlić

Na osnovu člana 73. stav (3) Zakona o turizmu Unsko-sanskog kantona („Sl.glasnik Unsko-sanskog kantona“ broj: 8/17) a u vezi sa članom 35. tačka cc) Statuta Grada Bihaća („Službeni glasnik Grada Bihaća“, br.13/15) Gradsko vijeće Grada Bihaća, na svojoj sjednici, održanoj2017.godine, donosi:

ODLUKU
o osnivanju Turističke zajednice Grada Bihaća

I OSNOVNE ODREDBE

Član 1.

(Predmet Odluke)

- (1) Ovom Odlukom se osniva Turistička zajednica Grada Bihaća.
- (2) Osnivač Turističke zajednice Grada Bihaća jeste Gradsko vijeće Grada Bihaća.

Član 2.

(Naziv Turističke zajednice)

- (1) Naziv turističke zajednice glasi: Turistička zajednica Grada Bihaća (u daljem tekstu: Turistička zajednica);
- (2) Skraćeni naziv Turističke zajednice Grada Bihaća je: TZ Bihać;

Član 3.

(Sjedište Turističke zajednice)

- (1) Sjedište Turističke zajednice je u Bihaću u ulici Bosanska broj 1.

Član 4.

(Pravni status)

- (1) Turistička zajednica ima svojstvo pravnog lica i stiče ga upisom u akta o osnivanju u sudski registar;
- (2) Rad Turističke zajednice je javan, što se ostvaruje na način propisan Statutom;

Član 5.

(Pečat i štambilj)

- (1) Turistička zajednica Grada Bihaća ima pečat i štambilj;
- (2) Dimenzije, oblik i sadržaj pečata i štambilja će biti propisani Statutom;
- (3) Bliže odredbe koje se odnose na broj, upotrebu i čuvanje pečata i štambilja Turističke zajednice uređuju se Statutom i aktima direktora Turističke zajednice;

II CILJEVI I DJELATNOST TURISTIČKE ZAJEDNICE

Član 6.

(Osnivanje Turističke zajednice)

Turistička zajednica se osniva radi razvoja, unapređenja i promocije turizma na području grada Bihaća i privrednih interesa pravnih i fizičkih lica koji pružaju ugostiteljske usluge ili obavljaju drugu djelatnost neposredno povezanu sa turizmom.

Član 7.

(Ciljevi Turističke zajednice)

Ciljevi osnivanja Turističke zajednice Grada Bihaća su:

- a) unapređenje općih uslova boravka turista kroz formiranje cjelovite turističke ponude, podizanje kvaliteta turističkih i drugih komplementarnih usluga, očuvanje i stvaranje prepoznatljivog i privlačnog turističkog ambijenta jedinica lokalne samouprave;
- b) razvijanje svijesti o važnosti turizma, kao i privrednim, društvenim i drugim efektima turizma, o potrebi i važnosti očuvanja i unapređenja svih elemenata turističkog proizvoda, a posebno zaštite životne sredine;
- c) podsticanje razvoja turističke infrastrukture i pružanja informacija turistima;
- d) promocija turističkog proizvoda jedinica lokalne samouprave.

Član 8.

(Djelatnost i zadaci Turističke zajednice)

(1) Djelatnost Turističke zajednice se zasniva na načelu ostvarivanja javnog interesa u oblasti turizma, čiji je osnovni cilj promocija turizma na području grada Bihaća, bez ostvarivanja neposredne dobiti.

(2) Izuzetno od stava (1) ovog člana, Turistička zajednica može da:

- a) organizira manifestacije i priredbe,
- b) objavljuje turističke komercijalne oglase u oglasnim medijima,
- c) prodaje suvenire, ulaznice, turističke karte i brošure, osim vlastitog promotivnog materijala,
- d) obavlja i druge poslove od javnog interesa koji su u funkciji razvoja turizma i koji nisu u suprotnosti sa ovom Odlukom, Statutom, Zakonom o turizmu Unsko-sanskog kantona („Službeni glasnik Unsko-sanskog kantona“ broj: 8/17) ili drugim drugim propisima.

(3) Osnovni zadaci Turističke zajednice su sljedeći:

- a) objedinjava turističku ponudu grada;
- b) preduzima mjere i aktivnosti na kreiranju turističkog proizvoda i turističkog imidža grada, kao i radnje na formiranju marke turističkog proizvoda destinacije grada;
- c) radi na promociji, plasmanu i podršci realizacije turističkog proizvoda, kao i pojedinih njegovih dijelova, vrijednosti usluga, koji čine integralni turistički proizvod;

- d) vrši promociju plansko-projektne dokumentacije iz oblasti turizma i njima komplementarnih djelatnosti;
- e) radi na kontinuiranom inoviranju turističkog proizvoda i aktiviranju novih turističkih prostora;
- f) organizira jedinstveni turistički informacijski sistem, sistem prijave i odjave turista i statističku obradu u skladu sa evropskim standardima;
- g) saraduje u aktivnostima i poslovima vezanim za standardizaciju, kategorizaciju i klasifikaciju turističkog proizvoda, usluga i objekata;
- h) radi na istraživanju turističkog tržišta u cilju pozicioniranja turističkog proizvoda na turističkom tržištu;
- i) prati stanje na turističkom tržištu u cilju blagovremenog donošenja odgovarajućih odluka;
- j) preduzima mjere i aktivnosti za razvoj i promociju turizma u svim djelovima grada;
- k) obavlja informativne poslove u vezi sa turističkom ponudom i promoviše turističku ponudu grada u zemlji i inozemstvu;
- l) saraduje sa turističkim zajednicama u Bosni i Hercegovini, u zemljama u okruženju, Evropi i svijetu;
- m) saraduje sa putničkim agencijama i JP Nacionalnim parkom "Una" d.o.o. Bihać vezano za turističke posjete i obilaske zaštićenih područja;
- n) podstiče, unapređuje, promoviše i štiti izvorne vrijednosti i stvara uslove za njihovo korištenje u granicama održivog razvoja turizma grada,
- o) koordinira poslovima razvoja turizma na kantonalnom, entitetskom i državnom nivou;
- p) radi na razvoju gostoprimstva, očuvanju prirodnih i kulturnih vrijednosti i unapređenju ekološke zaštite prostora na području grada Bihaća;
- r) radi na pripremi i implementaciji događaja (event) od važnosti za grad;
- s) obavlja i druge poslove propisane Zakonom o turizmu Unsko-sanskog kantona („Službeni glasnik Unsko-sanskog kantona“ broj: 8/17) ili drugim propisima.

III FINANSIRANJE TURISTIČKE ZAJEDNICE

Član 9.

(Finansiranje Turističke zajednice)

(1) Prihodi Turističke zajednice su:

- a) prihodi ostvareni preraspodjelom boravišne takse (80% naplaćenih sredstava od boravišne takse sa područja grada Bihaća – čl.88. stav (2) Zakona);
- b) prihodi iz Budžeta Grada, Kantona, na osnovu posebnih programa;
- c) prihodi od obavljanja privrednih djelatnosti iz člana 5. stav (2) ove Odluke;
- d) prihodi po osnovu učešća u posebnim domaćim i međunarodnim programima suradnje;

- e) donacije,
- f) kreditna zaduženja uz prethodnu suglasnost osnivača;
- g) prihodi iz drugih izvora.

IV AKTI TURISTIČKE ZAJEDNICE

Član 10.

(Akti Turističke zajednice)

(1) Akti Turističke zajednice su Statut i drugi opći akti kojima se regulišu odnosi u Turističkoj zajednici.

Član 11.

(Statut Turističke zajednice)

(1) Statutom Turističke zajednice će se propisati oblik i sadržaj pečata i štambilja, te eventualno znak Turističke zajednice.

(2) Prava i obaveze Turističke zajednice utvrđuju se zakonom i statutom Turističke zajednice.

(3) Statut Turističke zajednice sadrži odredbe kojima se bliže uređuje:

- a) naziv i sjedište,
- b) djelatnost i zadaci,
- c) unutrašnja organizacija,
- d) nadležnost organa upravljanja i drugih organa,
- e) način odlučivanja i glasanja,
- f) zastupanje i predstavljanje,
- g) prava, obveze i odgovornost zaposlenih,
- h) način organizovanja posla,
- i) imovina, način sticanja imovine i raspolaganja imovinom,
- j) način ostvarivanja javnosti rada,
- k) način i postupak donošenja Statuta i drugih općih akata,
- l) druga pitanja od značaja za poslovanje Turističke zajednice.

(4) Statut i Odluku o izmjenama i dopunama Statuta usvaja Nadzorni odbor uz prethodnu suglasnost Gradonačelnika.

(5) Ako Turistička zajednica ne donese Statut, odnosno Odluku o izmjenama i dopunama Statuta u roku od mjesec dana, od dana prijema suglasnosti iz stava (3) ovog člana, smatrati će se da suglasnost nije ni data.

(6) Statut Turističke zajednice i njegove izmjene i dopune objavljuju se u Službenom glasniku Grada Bihaća.

V ORGANI TURISTIČKE ZAJEDNICE

Član 12.

(Organi Turističke zajednice)

- (1) Organi Turističke zajednice su: direktor i Nadzorni odbor.
- (2) Članove Nadzornog odbora imenuje i razrješava Gradonačelnik na prijedlog Službe nadležne za turizam.
- (3) Direktora Turističke zajednice imenuje i razrješava Gradonačelnik na prijedlog Nadzornog odbora.
- (4) Organi Turističke zajednice imenuju se na period od četiri godine, a članovi mogu biti ponovo imenovani, najviše na još jedan mandat.
- (5) U slučaju prestanka mandata člana organa, prije isteka vremena na koje je biran, novi član se bira na vrijeme do isteka mandata na koji je izabran prethodnik.
- (6) Pri imenovanju članova Nadzornog odbora iz stava (1) ovog člana vodiće se računa o ravnopravnoj zastupljenosti oba spola.

Član 13.

(Nadzorni odbor)

- (1) Nadzorni odbor Turističke zajednice ima 3. člana.
- (2) U Nadzorni odbor obavezno se imenuje jedan predstavnik iz reda osnivača, a ostali članovi se imenuju iz reda naučnih i stručnih lica iz oblasti turizma. Članovi Nadzornog odbora imenuju se javnim konkursom u skladu sa Zakonom o ministarskim, vladinim i drugim imenovanjima u Federaciji BiH.
- (3) Nadzorni odbor iz reda svojih članova bira predsjednika.
- (4) Nadzorni odbor:
 - a) donosi Statut Turističke zajednice,
 - b) donosi poslovnik o svome radu,
 - c) donosi godišnji program rada sa finansijskim planom,
 - d) usvaja godišnji izvještaj o poslovanju i završni račun,
 - e) donosi pravilnik o radu,
 - f) odlučuje o korištenju sredstava u skladu sa zakonom i statutom,
 - g) provodi proceduru izbora direktora javnim konkursom u skladu sa Zakonom o ministarskim, vladinim i drugim imenovanjima u Federaciji BiH,
 - h) obavlja i druge poslove u skladu sa zakonom i statutom.
- (5) Akti iz stava (4) ovog člana donose se uz prethodnu suglasnost Gradonačelnika.
- (6) Sastav, način imenovanja članova i način rada Nadzornog odbora bliže se uređuju Statutom Turističke zajednice i Poslovnikom.

Član 14.

(Direktor Turističke zajednice)

- (1) Direktora Turističke zajednice imenuje Gradonačelnik na prijedlog Nadzornog odbora.
- (2) Direktor se imenuje na period od četiri godine, javnim konkursom u skladu sa Zakonom o ministarskim, vladinim i drugim imenovanjima u Federaciji BiH, a može biti ponovo imenovan najviše još jedan mandat.
- (3) Direktor predstavlja i zastupa Turističku zajednicu, organizira i rukovodi radom i poslovanjem Turističke zajednice, donosi Pravilnik o organizaciji i sistematizaciji poslova i radnih zadataka, predlaže akte koje donosi Nadzorni odbor, izvršava odluke Nadzornog odbora i preduzima mjere za njihovo provođenje, stara se o zakonitosti rada, odgovara za korištenje i raspolaganje imovinom i vrši druge poslove utvrđene zakonom i statutom.

Član 15.

(Unutrašnja organizacija)

- (1) Turistička zajednica je pravni subjekt organizovana na funkcionalnom principu, čime se omogućava efikasnost u radu i upravljanju, operativnost u donošenju odluka i obaveznost njihovog provođenja.
- (2) Unutrašnja organizacija Turističke zajednice bliže će se odrediti Statutom i posebnim aktom u skladu sa zakonom i ovom Odlukom.

VI NADZOR NAD RADOM TURISTIČKE ZAJEDNICE

Član 16.

(Nadzor nad radom Turističke zajednice)

- (1) Nadzor nad radom organa upravljanja i rukovođenja Turističke zajednice grada obavlja Gradonačelnik putem Službe nadležne za oblast turizma i Kantonalna uprava za inspekcijske poslove.
- (2) Gradonačelnik nadzire zakonitost rada, zakonitost akata i stepen izvršenja programa rada Turističke zajednice.
- (3) U vršenju nadzora Gradonačelnik je ovlašten da:
 - a) zahtjeva izvještaje i podatke o radu,
 - b) utvrdi stanje izvršavanja poslova, upozori na uočene nepravilnosti i odredi mjere i rokove za njihovo otklanjanje,
 - c) izdaje instrukcije,
 - d) naloži poduzimanje poslova koje smatra potrebnim,
 - e) pokrene postupak za utvrđivanje odgovornosti,
 - f) obavjesti nadležnu inspekciju u skladu sa posebnim zakonom,
 - g) poduzme mjere za koje je ovlašten.

(4) U slučaju da organi upravljanja i rukovođenja Turističke zajednice postupe suprotno odredbama ove Odluke i Zakona o turizmu Unsko-sanskog kantona („Sl.glasnik Unsko-sanskog kantona“ broj: 8/17) Gradonačelnik će pokrenuti postupak utvrđivanja njihove odgovornosti.

(5) U vršenju nadzora iz stava (1) ovog člana Gradonačelnik je obavezan da Gradskom vijeću pripremi godišnju informaciju o realizovanim projektima Turističke zajednice koji su finansirani iz sredstava javnih prihoda.

VII PRELAZNE I ZAVRŠNE ODREDBE

Član 17.

(Lice ovlašteno za zastupanje do imenovanja direktora)

(1) Ova Odluka je pravni osnov za upis Turističke zajednice u Sudski registar Općinskog suda u Bihaću.

(2) Do raspisivanja konkursa, izbora i imenovanja direktora Turističke zajednice Grada Bihaća, a najduže 6. mjeseci osoba ovlaštena za zastupanje i upis Turističke zajednice u Registar suda je

(3) Imenovani iz t.(2) ovog člana je dužan da, u roku od 8. dana od dana objave ove Odluke u Službenom glasniku Grada Bihaća, podnese zahtjev za upis Turističke zajednice u Sudski registar.

Član 18.

(Donošenje općih akata)

(2) Nadzorni odbor je dužan u roku od 60. dana od dana upisa Turističke zajednice u Sudski registar, donijeti Statut, Poslovnik o radu i ostala opća akta iz člana 9. tačka (4) ove Odluke.

Član 19.

(Troškovi osnivanja)

Troškove osnivanja Turističke zajednice Grada Bihaća snosi osnivač.

Član 20.

(Početak rada)

Turistička zajednica Grada Bihaća počinje sa radom danom upisa u Registar suda.

Član 21.

(Ostala pitanja)

U pogledu ostalih pitanja u radu Turističke zajednice, koja nisu regulisana ovom Odlukom, primjenjuju se odgovarajuće odredbe Zakona o turizmu Unsko-sanskog kantona („Sl.glasnik Unsko-sanskog kantona“ broj: 8/17) i zakona koji reguliše sistem javnih službi;

Član 22.

Ova Odluka stupa na snagu osmog (8.) dana od dana objavljivanja u Službenom Glasniku Grada Bihaća.

Broj:
Bihać, 07.12.2017.godine

Predsjedavajući Gradskog vijeća
Davor Župa